

師

荔

廊

詩

集

卷

廿七

師荔扉先生詩集卷二十七雲南叢書集部之三十三

滇西師 範荔扉

樊城

董家籬落顧家樓雨霽江城夜氣幽銀燭易斜人易醉  
蕭蕭殘笛水東頭

亢村

不斷征塵擁碧空南來車馬太匆匆春風二月黃河道  
乍見桃花着雨紅

邯鄲

霽雪晴雲小閣春天涯何事獨沉淪憑君一曲琵琶怨

喚醒黃梁夢裏人

沙流河

桃根桃葉總關情  
慣與春風管送迎  
三醉沙流河畔酒  
臉波時映夕陽明

璧月盈盈照叵羅  
坐斜銀燭爲聞歌  
新聲兩變從前調  
忍不當筵喚奈何

柳枝詞

有序

燕妓張玉仙有殊色  
玉圍頻眷之近聞其避客  
三河一達官購以五百金  
強而弗許遂爲所辱  
狼狽已極感賦柳枝詞八章  
並寄玉圍

記與君平並馬遊章臺人靜月如鉤長條送綠嬌無賴  
擡舉春風上畫樓

清波灩灩曉雲低箭桿河邊綠正齊欲去還留人又醉  
日高猶自聽鶯啼

幾度江頭送客歸石橋風過水添肥花開已是無拘束  
知向才人袖裏飛

風情似酒復如雲雲易怡人酒易醺耐可重來秋色老  
晚蟬淒咽不堪聞

露葉風枝映碧苔夕陽無復燕飛來門前一任春如錦  
不肯移根別處栽

西風忽妬楚宮腰瘦盡當時踈地條生意縱存魂已斷  
十分憔悴五分嬌

木落長天少雁鴻柔絲無力敢淩風年來不盡青衫淚  
半灑金臺夕照中

含情爲詠柳枝歌不見清陰拂玉羅若寄此詩金筑去  
曉風殘月恨如何

晚風詞

晚風池館芰荷香樹樹幽蟬噪夕陽閒背玉羅窻格下  
睡絨爲繡紫羅囊

斜漢橫天半欲沉鳳凰絃急寄情深啼痕着袖香難浣

對此曾消鍊石心

雙雙照影入芙蓉  
朱粉消沉髻半鬆  
儂自病來儂自瘦  
干卿何事瘦於儂

移得梅花入畫闌  
春風餘暖亦餘寒  
從今不作羅浮夢  
夜夜窻前帶月看

簾外輕寒起畫眠  
淡雲微雨養花天  
素琴彈罷渾無事  
自汲新泉浸水仙

百花紅照水晶簾  
寸寸新香手自添  
無事翻嫌春晝永  
坐拈金管注楞嚴

梧窻葉落晚風尖  
坐久親持半臂添  
明月一階涼似水

莫教容易放湘簾

聚散人間總似萍  
好從禪板訂來生  
和南水月觀音像  
一度燒香一念名

離棕四首

鎮日相思不計時  
此情須付與天知  
夢猶迷路休言醒  
合亦傷神莫怨離  
身作癡雲橫古塞  
心如駭浪倒滇池  
最憐五月初三夜  
燈下憑肩說水嬉

各有幽懷各自思  
秋蘆門巷晚菰時  
原知是玉無妨炫  
即使爲雲不敢辭  
何處更栽連理樹  
半生徒賦斷腸詩  
菱花鏡在曾同對  
獨照塵顏淚暗滋

此才端可續青箱  
罰作紅顏便可傷  
詠絮空傳言語妙  
避人深覺性情方  
秋闌有月堪隨影  
春院無花敢鬪香  
螺髻山前三載住  
卿原溫惠我原狂

曉風涼透白羅裳  
何計能消夏日長  
遂出新詞同比較  
還餘軟語共商量  
鶴棲瓊樹翎猶短  
蝶戀花叢夢亦香  
往事回頭堪一歎  
人間聚散海茫茫

### 憶梅

難禁冷蕊復疎枝  
索笑曾經記往時  
一種簷前好風月  
共君閒處各相思

每於清極畏人聞  
脉脉香含裊裊雲  
我卽是卿卿是我

春山影裏坐斜醺

窈窕簾櫳江上村  
幽篁滿徑翠侵門  
玉蘭香簇紅羅艷  
冷沁樓心月一痕

蘆簾紙閣影娟娟  
從此花中有謫仙  
療盡饑腸消盡渴  
睡餘同倚薄寒天

錦帷春靜褪宮粧  
淺淺雙蛾印額黃  
翠羽聲中天易曉  
覺來常帶一身香

百花頭上一枝開  
管領東風壓玉臺  
眞色眞香天付與  
不教容易過江來

布衣

布衣已自勝綾羅未定分香與擲梭照面忽聞眉有語  
掉頭微覺眼生波話因鄭重聰明少情爲驚疑宛轉多  
新月半簾涼似水匆匆無奈箇人何

愛分椒雨勸櫻脣墮地紅生兩頰春醉態翻疑雕軟玉  
名花都合避佳人坐傳烟管心情熱對倚燈窻笑語真  
比似醒時多斌媚五年孤却掌中身

晚粧初罷酒初醺灼灼湘蓮覆楚雲踏遍蒼苔貪履武  
立殘秋月喜隨君暗量乍可盈三寸趺坐偏宜露二分  
偶向人前驚着眼相看一笑掩紅裙

悄揭湘簾入綺櫳披衣驚起態惺忪低聲欲語神猶懶

擡眼相窺面轉紅  
翡翠衾邊無夢到  
芙蓉鏡畔有心通  
粧成忽與參宜稱  
雙鬢香生一握中

旅次紀夢

相逢相失總傷神  
如此因緣局太新  
走馬終難忘北地  
窺牆已自許東隣  
誰憐皎月三更夢  
肯作寒窗一笑人  
褪盡芙蓉陳盡玉  
覺來空帶十分春

題郭金三滿綠軒詩後

有序

玉臺編體妙奪徐陵金縷傳  
卮魂銷杜牧羶榆  
關於眼底僕本恨人瀉渤海  
於杯中君眞達者  
遂於慷慨悲歌之地忽聞風流  
好事之稱湘笛

飛時聲綠色媚畫屏開處色以聲妍紅綻櫻桃  
映微霜而弄影院翻楊柳橫霽雪以呈姿然而  
去來靡定聚散何常樹亦相思花空解語紀離  
悰則青梅紅豆各致纏綿尋密約則秋水春山  
都勞夢寐親裁錦紙立構新篇有字皆香無詞  
不麗推斯高韻行當令綠草爲茵識此荒言還  
須喚紫雲捧硯

曉風庭院杏初紅按曲人來白雪中譜出旗亭新樂府  
燈前親付與玲瓏

窈娘堤接秦娘家空對春風感歲華自向綠楊陰裏醉

關心不復有桃花

清歌一曲海雲邊不必春深綠已全  
明月半斜燈半爇  
驚波如黛草如烟

迴眸一顧有清輝風擺楊枝綠四圍  
我亦當筵同叫絕  
玉簫聲曳彩雲飛

落花二首

柳自成陰草自芳飛花點點黯池塘  
紅消曉露蜂鬚重  
粉漬新泥燕嘴香細數難禁春瑣碎  
閒吟易惱月昏黃  
明年有約休相負不放東風過短牆

名花一夜嫁東風併作西園漠漠紅  
鏡檻烟寒金剪合

綺窗香灺玉瓶空  
新愁詞客三春暮  
乍病佳人二月中  
試向曲闌干外望  
綠陰青子半成叢

新柳二首

一捻香銷十日魂  
踈踈細雨暗柴門  
折經玉手春無影  
種向金城綠有痕  
鬪草烟霏盤馬路  
倚樓風漾落花村  
祇今識得東皇意  
舊恨休從笛裏論

絲絲翠結美人魂  
勾惹春風下萼門  
綠未成烟憐鬢影  
香初着露釀啼痕  
東湖殘雪才經雨  
十里長堤半繞村  
斜倚玉臺腰懶折  
思將肥瘦一齊論

秋水二首

二分明月古揚州  
淼淼平湖淨不流  
淚雨低含千頃碧  
眉峯倒暈一天秋  
芙蓉花淺鴛鴦睡  
荷菱香深翡翠遊  
最是多情桃葉渡  
照人歡喜照人愁

夕陽山下水生波  
相望盈盈奈爾何  
殘柳一溪啼越女  
幽篁兩岸惱湘娥  
雲歸遠浦帆初卸  
葉落長天雁又過  
記得垂虹亭上坐  
荻蒲風送采菱歌

遠山二首

四圍山色捲簾窺  
疊疊青橫卓氏眉  
春入小樓連雨暗  
影含秋水帶雲垂  
楚天似墨難爲夢  
吳岫如顰却怨誰  
倚徧斜闌看不足  
芒鞋竹杖擬相隨

落盡閒花不下簾  
遠山如黛影纖纖  
青浮海外陰晴異  
墨潑襄陽大小兼  
幾欲含毫臨畫本  
爲誰染恨到峯尖  
迢迢萬里文園宅  
徑合移來頂上添

一息

一息猶存未可知  
風吹死草綠離離  
誰憐月缺花殘後  
空結朝雲暮雨思  
到此真教成薄命  
相逢莫更說佳期  
含悲不敢吞聲哭  
獨對殘燈誦輓詩

記聞薌澤五經年  
苦趣常居樂趣先  
刻骨恩情中酒後  
畏人心跡早涼天  
聰明過恐君難免  
道學名知我獨全  
拍手忽生歡喜相  
更從何地作團圓

臨終日拍手笑樂且日好去團圓也

已成情恨復情癡惡耗傳來信忽疑愁易填膺仍諱病

藥難攻脇枉求醫

病劇日向予求方已係不治之症

淒涼被履餘今日

辛苦刀砧記往時我未言歸卿便死不教人世有生離  
此時懷抱復誰憐淚灑鶯花二月天化石終難辭海上  
爲雲或許照尊前烟筒已剝香猶烈食譜頻翻味不全  
良晤永乖遺約在錦鞵空付枕函邊

前夢次旅次紀夢韻

匆匆雲雨盡堪神笑語淒涼枕席新覺後枉懷珠作珮  
生前空倚玉爲鄰本無甘露能消酒豈有桃花解誤人  
裙釧五更搖冷月夜臺歸去向誰春